

感舊集

感舊集卷五

漁洋山人選

德州盧見曾

趙進美

三十首補遺二首

進美字韞退山東益都人舉正庚辰進士官福

建按察使有清止閣集

漁洋詩話趙韞退官江西有詩百餘篇余取其南康登樓一絕云云

又賦得楓葉微紅近有霜云云梨花云暮煙無語更依依清影含春望
欲稀疎近瑣窗留月照寒垂網戶見鶯飛共停閣外青絲騎細舞燈前
白紵衣莫向後庭歌玉樹故宮風雨已全非 田綸霞雲古懽堂集趙
公墓志公儀表外明風神內照早通二氏之學靜默寡言戊午識公于
鐵鶴菴侍坐受教得聞公之論詩也曰詩之合者于宋得嚴滄浪明得
徐昌穀王元美昌穀深造然所自爲不媿其言者十可五六焉元美可
三四耳夫格律嚴則境地狹擬議盛則性情薄作者病之至于狂放背
馳又不足道矣或者雌黃異調訕諫先哲是未履門閭而歷數曲室之
藏也陶謝不必爲潘陸李杜不必爲王駱君子泯其同而慎其異可矣公之論詩如此

歲暮行

歲事欲暮雨雪繁客聽我歌慎勿喧使酒罵坐人無與
言獨騎肥馬暮馳西門道逢故交下馬立勸我加餐揖
我入腰閒大箭何所爲明日折節讀書今日射鹿飲血
南山陲

北望

行者坡前荒草新兜鍪山下野鶯春楚天向北空雲樹
除却歸鴻未有人

聞笛

星河氣靜大江深長笛飄搖度夕吟風滿山城初入破
月明楚客欲沾襟不堪春至惟高枕忽作秋思散遠林
到處金戈連畫角此聲清怨恐難尋

微雨

冉冉扁舟鳥信風
木蘭花落綠陰通
傳聞漢上多游女
空閉青樓細雨中

寶應

聞道君王有射陂
漁榔荒草令人悲
垂楊尚弱東風急
倦客停帆見雁時

石門

石門寒色雨冥冥
遠起漁歌越客聽
短棹天涯自惆悵
亂鴉啼過女陽亭

雨中晚行

平野曠無際
短檠涼似秋
鳥喧過林雨
人語上灘舟
極

浦生漁火寒鐘遠寺樓泛槎非異域乘險不須憂

對酒

南風吹孔渡薄暮起寒波聽雨開門少沾襟向爾多客
懷淹伏枕歸路遠橫戈徒作勞人歎長吟金叵羅

早發進賢

鄔子驛靜野水斜鍾陵城開啼蚤鴉自憐道上嘶疲馬
何人花邊巾小車日侵林氣涼猶淺雨濕山嵐澹若加
少年讀書慕往事曾聞八月有浮槎

昌邑

楚水連平岫中流起暮煙波濤淹旅夢竹樹入江天稚
子夜鳴柝漁蠶寒放船淒其對浦火新月嶺猿前

微雨山行

微雨何處來勢與蒼山遠
石橫知瀨急峯出覺雲淺
人鳥不分徑水木共成岸
更入寒林幽自愛餘風善

上清宮

迢遙陟絕巘曉色靜閭里
閑知雲上下幻失峯終始
鳥喧紅泉邊雨止青松裏
習習幽谷風疊疊寒溪水
頗愛煙嵐深因識清淨旨
何須吹玉笙乃是瑤壇子

烏栖曲

烏求安栖風激其枝相顧鳴
喚踟躕心悲歲晏繁霜驕
日暮寒河馳短歎微吟何所
思但願有酒斟酌之佳人
勸我黃金卮檀槽象板聲參
差褰袂仰視夜何其天低

月淡星氣垂三十不足二十餘日讀魯連之策秦風詩
縱酒狂歌若有託歲月既去令人疑遶庭冰雪清縹緲
長庚明城頭烏啼吹角聲吁嗟海內方用兵

大孤山

谷風乍起蚤蟬語細雨時飛楓葉涼湖上青山晚無數
輕帆更過大孤塘

盤塘

盤塘風急野煙開白鷺依洲水遶迴曉發中流聞磬響
小舟載得社神來

春詞

捲簾攜趙瑟紅樓日暮看芙蓉春帳薄蓮葉晚舟寒可

憐不相識空住小長干

開窗捲羅幙冉冉暮雲碧園中雙蛺蝶飛上茱萸陌紅
雨濕素帆日落橫塘客

竹枝詞

遠堤烟接木蘭船細雨寒燈菰葉邊聞道長干消息近
從今夜夜夜對潮眠

遠樓修竹碧琅玕樓上何人夜倚欄獨唱竹枝聲未盡
石尤風起蕩舟難

武昌登舟

遠浦丹楓照暮天棹歌漁唱總堪憐清霜笛裏千門雁
明月刀頭萬里船到岸江聲晴自落近城山色晚方妍

荻蘆無際疎鐘起回首寒雲大別邊

廣陵懷古

爭奉華林翠輦遊空傳宰相領揚州青巾結陣兵先破
白水臨江氣已收五馬荆榛迷晉渡千家燈火亂隋樓
遺民猶自歌袁粲日暮風煙接石頭

南康登樓

返照臨高閣寒煙淡淡分城空何所有一半是匡君

賦得楓葉微紅近有霜

郭外西風遶岸斜長林秋靜有啼鴉微寒已入娟娟月
遠色初分澹澹霞千里題書臨白雁重陽疎雨映黃花
洞庭木葉傷心日寂寞懷人在水涯

龍泉

惆悵溪橋古樹涼
天涯行李豈能忘
已知山意多秋雨
自聽泉聲到夕陽

噪磯

石靜蛟寒雲氣遲
月明古木夫人祠
蘋花風起晚潮落
江畔獨行應不知

雨

水天汎遙角佇立
更夷猶露下洞庭
葉寒生鄂渚秋碧
雲凝薄暮芳芷隔
中洲彷彿靈風起
嬋娟不可求

武昌雜感

人生貴令名志士
豈苦貧披褐彼誰
子散髮行負薪遺

命請寢邱遠及十世親十世雖云遠飄忽如輕塵渚宮
昔遼遼章華亦嶙峋戶牖造太清製作疑鬼神朝爲粉
黛居夕與狐兔鄰時運有往來何用常悲辛濁醪展我
顏樽盡聊復斟令名尚不希富貴安足陳

晉室旣板蕩江表遂播棄勢弱難自存投刺盡除吏雖
擁天塹險終無百里寄舳艫屯上游按劒乃鷹視興酣
擊唾壺慷慨歌老驥揚舲出夏口山嵐浮兵氣旌旗暗
汀霧漠漠飛鳥避前驅方豕突妖孛已雨墜輿尸雜戎
軒清笳動哀吹吁嗟晉陽甲永爲千古戾

朔風墮白日水立天晝昏江漢失禹功歲暮蛟螭尊怒
鱗跋巨浪勢欲無厚坤鱸鮪亦跳梁變化隨山根舟楫

不可恃客意誰與論遠望耆舊里丁彼漢運屯我懷汚
上翁長歌歸鹿門

出郭鳬鷺集向野汀煙亂竹埤倚籬根曲曲帶江岍瘦
男行荷鍤衣結不及骭壯婦鳴夕舂散髮垂兩朮十年
奉軍實瘠田困水旱昨日賣耕牛吏呼夜未半扁舟破
百家千里供一饔無乃戍士勞自覺民生賤北鄰長蒿
藜骨肉各獸散幸餘干戈身敢起征輸歎荒溪竄碩鼠
霜風送涼雁悔不當盛年努力事弓劒

微雨

以下補遺

鸚鵡洲閒春草深江氣空濛沒遠岑漁舟莫泊風拍岍
流鶯欲語煙滿林

畫竹

記得君山古廟前沙鷗如雪水如天數叢惟在蒼崖下
風雨纔晴便有烟

劉孔和

三十四首補遺二首

孔和字節之山東長山人大學士鴻訓之子有

日損堂集

漁洋詩話劉孔和為詩豪邁雄放有東坡放翁之風一代奇才也題趙松雪調琴殿茗圖二首云云聽小史彈

琴云高梧修竹曉沈沈侍子垂簾拂素琴聽盡明光三十段碧池涼雨一時深池北偶談劉孔和王遵坦二人皆負氣所馳相交善王居泉

谷劉居長白皆有林泉之美崇正閒見天下將亂散財結客甲申歲孔和殺閹賊僞令率精騎萬人南赴金陵至淮陰以兵屬劉澤清清與孔和素交好時為藩鎮貴重無比然好為詩一日大會將吏廣坐朗吟賓佐交口譽之孔和仰視獨無語強問之曰公誠名將才然此事定復不急澤清怒罷酒賓客皆惶懼失次孔和傲然而出澤清益怒遣人追及舟中拉殺之已而金陵以為副總兵官則孔和死數日矣嘗有贈王詩云都無殺者黃江夏豈有食之嚴鄭公後竟死澤清手與黃祖事絕類云按劉相國鴻訓於明愍帝朝忤奄黨以改勅書下詔獄謫戍死倪文正

元璐爲作傳故集中有庚辰感賦長歌今爲補註至甲申變後孔和崎
嶇萬死不忘討賊卒罹奸帥之禍有關明季史事尤不可不傳於世云

李陵

萬物各有知胡爲恃自強人生畏少年意氣多分張報
國挾白刃主志摧臣腸不如學巫蠱終死在帝鄉

感石竹

偶喜廬陵羅景綸獨從花木辨天真離騷遺梅詩詠實
煥蕭鬱鬯今不辰武后採山牡丹出山崩見竹
瀘戎荔枝今不數勾漏丹砂產已貧何必汝潁多奇士
安知燕趙生佳人吁嗟乎造物旣如此令人浩歎瞻蒼
旻南窗石竹一百種烏能爛漫同千春

瓶梅

偶借東鄰樹將來瓶裏看
晚窗清臭合長日綠枝寒
歷落明書幌蕭條對古冠
閉門三十日春色未曾闌

大風行

連朝捲地北風惡掀簸春陽昏
日腳黃沙如雨窗戶閒
慘澹蔽塞天垂幕束書閣筆斂襟
坐巽氣蟠胸愁廣漠
驅逐溟海鬪鯤鵬九萬扶搖轉
羊角斜斜靡靡下鵬鶚
來與狐兔潛幽壑蘭筋駿馬立不定
將軍箭折弓難彊
不知何處起狼煙蚤從今日占兵落
瘠土豈堪事爭戰
飢腸那復支瘟癘汚人無計避
元規悔吝家人向嗃嗃
沛宮高會羣進爵萬乘歸來雜悲樂
慷慨作歌隆準人
老不讀書氣張拓猛士猛士守四方
千里相望心如昨

兔死狗烹野雉驕吁嗟淮陰不可作

過訪幼量書圃

堦前修竹綠成林
侍子清朝拊素琴
聽盡明光三十段

碧池涼雨一時深

詩話題係聽小史彈琴首二句小異

石紋苔色上窗紗
綠茗初煎更筍芽
遲日園林花氣合
十分鶯蝶在人家

題趙吳興調琴啜茗圖

秋宮肅肅古衣裳
靜女無愁黛亦蒼
不點疎螢和月色
絹頭已作百年涼

厓山遺恨捲黃沙
彩筆王孫弗憶家
忍向卷中摹舊事
直須羞殺後庭花

七夕與邱將軍話舊兼爲手談

伏生之里大將出生來所志唯馬革幕中已多指眎功
疆場血戰不勝筆堪嗟再謁典連敖不知三世還執戟
別君十載一瞬間歷盡鋒鏑與桔桮背貴那可入韓罪
晴白聊足嘲吳刻多君談笑貫索中坐待明光銷蠹蝕
昨聞廣武拜軍師聖主懷邦丈人吉如今驅戰真市人
聒聒怒蛙誰與軼願君橫臂障東海莫教鄉梓生荆棘
安有健婦把犁鋤但見春林巢小鳥從來攘外必內安
隱憂不在河北賊夜涼浮白戒談事更向局中問劫急
已知文偉能辨賊不待當場辨白黑贊君斂手推棊枰
論兵艾艾終羞吃減敵料應如覆局沙場不使還一匹